


TEZAU LITURGIC

5 IULIE

**ACATISTUL
SF.CUVIOASE-MUCENIȚE
ELISABETA
TEODOROVNA
DE LA
MOSCOVA
II**



MOSCOVA, 2000



Акафист

святой преподобномученице

великой княгине Елисавете

Кондак 1

Избранная от рода державного дочь
Российская, любовью изобильною и
милосердием Богу и ближним добре
послужившая, за веру во Христа Господа нашего
душу свою положившая и венцем славы
Христовы украшенная, восхваляем; подвиги и
страдания твоя, с любовью воспевающе ти сице:

Радуйся, святая преподобномученице Елисавето,
красото Церкви Российския, невестою
Христовою быти удостоенная.

Икос 1

Ангельскою любовью Христа возлюбившая и
Тому Единому служить желавшая измлада
материю твоею поучаемая, в трудах, молитвах и
милостыни образ добродетелей явила еси. По
кончине же матере твоя и ближних сродников
крестный путь, Господем заповеданный,
уразумела еси. Темже дивящися таковому от
юности твоему избранию, со умилением взываем
ти:

Радуйся, от юности Христа возлюбившая;
радуйся, Христова агнице избранная.

Радуйся, от родителей семена веры приимшая;
радуйся, в страхе Божии ими воспитанная.

Радуйся, добродетели матери твоея
унаследившая;

радуйся, трудолюбию и милосердию ею
наученная.

Радуйся, сердцем в Бозе утвержденная;
радуйся, с верою и упованием понесшая крест
твой и Христу последовавшая.

Радуйся, земли отечества твоего цвете
благоуханный;

радуйся, чистотою жизни твоея Небеса
возвеселившая.

Радуйся, избранная Богом на служение
страждущим;

радуйся, молитвеннице наша пред Богом.

Радуйся, святая преподобномученице Елисавето,
красото Церкви Российския, невестою
Христовою быти удостоенная.

Кондак 2

Виде Господь благое сердца твоего изволение, яко от юности возжелела еси житие проводить во благочестии и чистоте, к небесней красоте очи сердца твоего устремляющи и огонь любви к Богу в себе воспламеняющи. Молитвами твоими и наша сердца любовью к Богу просвети, да с тобою воспоим Ему: Аллилуиа.

Икос 2

Разумом свыше просвещаемая, святая Елисавето, не убоялася еси оставить отечество, род и дом отца твоего и в новое отечество вселиться, егда браком сочеталася еси с российским: великим князем Сергием, да с ним Богу послужиши, и вкупе с супругом твоим в целомудрии пожила еси, истинную любовь к людям российским показующи. Мы же с любовью взываем ти сице:

Радуйся, славная от земли Запада пришелице;

радуйся, новую отчизну — землю Российскую обретшая.

Радуйся, благоверная княгине, стране нашей верно послужившая;

радуйся, в добрых делах наших наставнице.

Радуйся, в супружестве в любви и целомудрии
пожившая;

радуйся, яко супругу твоему в делах благих
помощница была еси мудрая.

Радуйся, супругом благочестивым
покровительнице;

радуйся, материнскою любовью нас
согревающая.

Радуйся, заповеди Господни исполнити
возжелевшая;

радуйся, ревность по Бозе в сердцах наших
воспламеняющая.

Радуйся, красотою душевною и телесною всех
возрадовавшая;

радуйся, всего мира христианского украшение.

Радуйся, святая преподобномученице Елисавето,
красото Церкви Российския, невестою
Христовою быти удостоенная.

Кондак 3

Силою Божественный благодати во спасение
умудренная, разумом твоим познала еси веру
истинную, княгине милостивая Елисавето, и во

Святей Земли пребываючи, утвердилася еси в желании прияти Православие, воспеваючи просветившему тя Богу: Аллилуиа.

Икос 3

Имущи сердце, добрей земле подобящееся, веру православную удобь восприяла еси, темже святого миропомазания и причащения Святых Христовых Тайн в праздник Воскрешения праведного Лазаря сподобилася еси. Мы же, славяще просвещение твое благодатию Святого Духа, величаем тя:

Радуйся, в день Воскрешения праведного Лазаря веру православную приявшая;

радуйся, плоде благословенный Российския земли.

Радуйся, миропомазанием Святого Духа запечатленная;

радуйся, во Православии имя, данное ти от рождения, сохраняя.

Радуйся, святей праведней Елисавете тезоименитая;

радуйся, яко той житию усердно в подвизех подражала еси.

Радуйся, сыновом Запада путь к истинней вере показующая;

радуйся, яко благочестивии людие земли Российския память твою любовью чтут.

Радуйся, милостивая мати, милость у Владыки и Господа обретшая;

радуйся, и о нашем помиловании усердно молящаяся.

Радуйся, свет Божественный в сердце своем носившая;

радуйся, тьму жизни нашея светом Христовых заповедей озаряющая.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 4

Буря злобы врага рода человеческого непоколебля, святая, егда благоверный супруг твой мученически смерть претерпе, емуже сострадаючи, велие мужество и христианскую любовь явила еси. Ангели же, душу супруга твоего возносяще, пояху: Аллилуиа.

Икос 4

Слышавше российстии людие о убиении благоверного князя Сергия, моляху Бога, да укрепит тя, святая Елисавето, в несении скорби сея. Ты же, жертвенною любовью укрепляема, в темнице убийцу супруга твоего посетила еси, к покаянию его подвизаючи и молитвы возносящи ко Господу о прощении его. Сего ради приими от нас, недостойных, похвалы сия:

Радуйся, заповедь Христову о любви ко врагом исполнившая;

радуйся, убийцу супруга твоего евангельски простившая.

Радуйся, мнози скорби и беды претерпевшая;

радуйся, бремя скорбей и печалей нести нам помогающая.

Радуйся, заблуждших на путь истины и покаяния наставляющая;

радуйся, о спасении грешников теплая ходатаице.

Радуйся, во тьме печалей светом надежды нас озаряющая;

радуйся, путеводная звездо всем чающим спасения.

Радуйся, окамененныя сердца наша во умиление приводящая;

радуйся, во всякой скорби нашей ко Христу за ны теплая молитвеннице.

Радуйся, злобу мира добром побеждавшая;

радуйся, людем российским любовь истинную показавшая.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 5

Боготечною звездою возсияла еси в земли Российстей, святая Елисавето, егда богатство и славу яко прах вменивши, в руце Божии жизнь свою предала еси, да послужиши Ему постом и молитвою, и к страждущим явила еси велию любовь и милосердие. Тако и путь жития нашего светом добродетелей твоих озари, да радостно возопиим Богу: Аллилуиа.

Икос 5

Видевше тя людие богоспасаемаго града Москвы дивную устроительницу Обители милосердия, возрадовашася, яко мнози жены и девы российския обретоша zde тихое и душеспасительное пристанище, подражающе святым женам-мироносицам Марии и Марфе в служении Богу и ближним. Сего ради, прославляюще тя, глаголем сице:

Радуйся, во славе земной суету мирскаго жития уразумевшая;

радуйся, имение свое раздавшая и нищету Христову возлюбившая.

Радуйся, град Москву обителию дивною украсившая;

радуйся, благое иго Христово на себе восприимшая.

Радуйся, многия жены и девы во Обитель милосердия приведшая;

радуйся, мудрая управительнице во спасение сестер твоих.

Радуйся, служению святых жен-мироносиц Марфы и Марии подражавшая;

радуйся, Обители твоя неусыпная
хранительнице.

Радуйся, в подвиге жизни духовная нас
утверждающая;

радуйся, путь от земли на Небо нам
показующая.

Радуйся, светило милосердия, над градом
Москвою восшедшее;

радуйся, всех отдавших жизнь на служение
ближним покровительнице.

Радуйся, святая преподобномученице Елисавето,
красото Церкви Российской, невестою
Христовою быти удостоенная.

Кондак 6

Проповедницею любви Божественной и
милосердия Его и ревнительницею благочестия
была еси в земли нашей, святая Елисавето, в
сердцах людей российских любовь ко Господу и
милосердие к братьям и сестрам нашим, в бедах
сущим, возгреваючи, да и мы твоим заветом
последующе, воспоим Богу: Аллилуиа.

Икос 6

Возсияла еси светом добродетельного жития в стране Российстей, преподобная мати наша Елисавето, во образе иночестем в посте и воздержании, в ночных бдениях и пениях молебных пожила еси, благочестию и смирению сестры обители твоея поучаючи, да и мы, тобою на путь тесный подвига духовного наставляеми, ублажаем тя:

Радуйся, путь иноческого равноангельного жития избравшая;

радуйся, обетом целомудрия чистоту сердца твоего явившая.

Радуйся, обетом нестяжания высоту духа твоего показавшая;

радуйся, обетом послушания Богу и ближним послужившая.

Радуйся, мудрая княгине и инокине пречестная;

радуйся, во образ женам христианским свыше предназначенная.

Радуйся, постом, бдением и непрестанными молитвами Богу угодившая;

радуйся, от сна греховнаго души наша пробуждающая.

Радуйся, ко исполнению заповеди о любви к Богу и ближним всех наставляющая;

радуйся, молитве сердечней нас научающая.

Радуйся, наставнице инокиням и собеседнице Ангелом;

радуйся, в сонме преподобных жен на Небеси прославленная.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 7

Хотящи волю Господню разумети, святая Елисавето, всецело предала еси себе в послушание старцем Гавриилу Спасо-Елеазаровскому, Алексию Зосимовскому, такожде и другие богомудрыя старцы вопрошала еси, ничтоже без их благословения творящи, волю же свою отсекаючи, темже и житие во Обители милосердия ко благу устраивала еси, непрестанно взываючи Богу: Аллилуиа.

Икос 7

Новое чудо показа Господь, егда дарова ти, святая Елисавето, благодать и силу болезни врачевати, разслабленныя укрепляти, бедствующим помогати, обидимых заступати. Ты же, облегчение и отраду страждущим содеваючи, немощным, всеми оставленным и увечным послужила еси со смирением и любовью. Темже и нас, грешных, твоею молитвою исцели и буди нам ко спасению управительница, да благодарственно воспоем ти:

Радуйся, в послушании духовным отцем и великим старцем пожившая;

радуйся, Великою Матушкою людьми российскими нареченная.

Радуйся, дар немощных души врачевати от Бога стяжавшая;

радуйся, болящия и безнадежныя от одра болезни возставляющая.

Радуйся, вдовиц и сирот благосердая попечительнице;

радуйся, алчущих питательнице и сущим в бедах скорая заступнице.

Радуйся, всеми презренных и отверженных не оставляющая;

радуйся, многия души от тьмы греховныя и погибели спасшая.

Радуйся, унывающим в скорбех и обстояниях мудрая утешительнице;

радуйся, и нас, удрученных болезнями и скорбьми укрепляющая.

Радуйся, кающимся грешником пред Богом предстательнице;

радуйся, людем российским помощнице милостивая богодарованная.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 8

Странное и страшное видение яви Господь духовнику Обители милосердия отцу Митрофанию. Ты же, о святая мати, сие видение изъясняючи, прорекла еси, яко велие и грозное испытание грядет на Церковь Русскую и державу нашу: святынъ поругание, брань братоубийственная, смута велия, мученическая

кончина царския семьи; но помилует Бог Россию по молитвам святых ея, с ними же ты ныне воспеваеши Богу: Аллилуиа.

Икос 8

Вся благодатию Божественною просвещаемая, святая Елисавето, мысленными очима гневное посещение Божие страны нашея зрела еси и пророчески вещала еси, яко мнози мученицы и исповедницы в земли Российстей возсияют. Темже все упование на Божию Матерь возложить люди русския призывала еси, верующи, яко молитвами Ея устроится и благословится земля наша. Мы же, ведуще проречения твоего о судьбе отчизны нашея сбытие, ублажаем тя сице:

Радуйся, храм Покрова Пресвятыя Богородицы во Обители милосердия воздвигшая;

радуйся, тем в руце Пречистей Матери Господа обитель твою предавшая.

Радуйся, храмов Божиих устроительнице;

радуйся, к Богородице молитвеннице наша неусыпная.

Радуйся, церквам Божиим благодеявшая;

радуйся, ради жизни вечныя неусыпно потрудившаяся.

Радуйся, житием своим Богу и Пресвятой Деве Богородице верно послужившая;

радуйся, все упование возлагати на Бога нас научающая.

Радуйся, кротость, тишину и мир сердцам нашим подающая;

радуйся, благодатными дары Духа Святаго украшенная.

Радуйся, яко прозорливо предрекла еси великия скорби земли нашея;

радуйся, яко помилова ю Господь.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 9

Вся любовью к Богу пламенеючи, святая Елисавето, не убоялася еси, егда приидоша во обитель, тобою созданную, безумнии людие, хотящии суд неправеден над тобою совершити. Ты же, Господом сохраняема, смерти тогда убегла еси, о вразумлении и просвещении

неразумных и заблуждших молящихся, Богу же во благодарении воспеваючи: Аллилуиа.

Икос 9

Ветий человеческих уста не возмогут достойно восхвалити крепость любви твоея во дни бед и напастей великих, обышедших отечество наше, егда не восхотела еси покинути Россию и обитель, тобою созданную, сестры тоя за веру православную даже до смерти стояти побуждаючи. Мы же с любовью восхваляем тя:

Радуйся, землю нашу возлюбившая,

радуйся, от людей российских с любовью прославляемая.

Радуйся, щитом веры во брани с врагом ограждатися нас научающая;

радуйся, решимость Господу последовати крестным путем в нас укрепляющая.

Радуйся, сестры Обители милосердия в вере и надежде утвердившая;

радуйся, на подвиг мученичества за Христа их наставлявшая.

Радуйся, приобщитися страstem Христовым удостоившаяся;

радуйся, в исповедничестве подвиже люди
российския утверждающая.

Радуйся, от рова погибели мнози спасшая;

радуйся, обители твоей и граду Москве
помощнице, покрове и защитнице.

Радуйся, любви жертвенней, вечней нас
научающая;

радуйся, вшедшая в радость Господа твоего.

Радуйся, святая преподобномученице Елисавето,
красото Церкви Российской, невестою
Христовою быти удостоенная.

Кондак 10

Спасительного подвига ищущи, святая
Елисавето, с радостью благодарила еси Бога,
яко сподоби тя понести крест Его. Темже просия
победою вера твоя, егда, к Голгофе своей
восходящи, непрестанно возглашала еси:
&»Слава Богу за все!&« Умоли, о мати наша, да
дарует нам Господь стяжати мудрость и силу за
веру правую даже до смерти стояти и воспевати
Ему едиными усты и единым сердцем: Аллилуиа.

Икос 10

Стена неборимая и заступление стране
Российстей даровая святая икона Божия
Матере Державная, Юже прияла есть во
Обители милосердия святая Елисавето, яко
знамение победы над миродержителями тьмы
века сего. Сего ради и мы, все упование на
Державную Владычицу отчизны нашей
возложивше, тебе яко истинную служительницу
и послушницу Пречистыя Матере Господа
восхваляем:

Радуйся, благодати и силы Божия исполненная;
радуйся, благую часть избравшая, яже не
отыметя от тебе.

Радуйся, в кротости и смирении Божией Матери
подражавшая;

радуйся, мудрая евангельская дево, елей
благодати собравшая.

Радуйся, Пресвятыя Девы Богородицы
благоговейная почитательнице;

радуйся, у Престола Ея непрестанно за ны
молящаяся.

Радуйся, образ самоотвержения нам явившая;

радуйся, друг друга тяготы носить нас
научающая.

Радуйся, чрез земныя скорби и страдания в
Царство Небесное вшедшая;

радуйся, любви и терпению в страданиях ради
Господа всех научающая.

Радуйся, ангельски на земли пожившая;

радуйся, унаследившая на Небеси венец славы.

Радуйся, святая преподобномученице Елисавето,
красото Церкви Российския, невестою
Христовою быти удостоенная.

Кондак 11

Пение молебное Божией Матери возносила еси,
святая Елисавето, в день празднования
Иверския иконы Ея, егда взяша тя нечестивии и
в темницу ввергоша. Ты же благодарила еси
Христа Бога нашего, давшего тебе не точию еже
в Него веровати, но и по Нем страдати, в узах
темничных воспеваючи Ему: Аллилуиа.

Икос 11

Свет Божественный осия тя, страстотерпице
святая княгине Елисавето, купно с
преподобномученицею Варварою, о Христе

сестрою твоею, и с прочими страстотерпцы
именитыми, егда в глубокий ров ввержена сущи,
тамо раны великаго князя Иоанна обязала еси,
страдания умирающих облегчала еси,
воспевающи священныя песнопения, за
убивающих же тя молилася еси: &»Отче, отпусти
им, не ведят бо, что творят&«. Уврачуй и наших
душ раны, о мати наша, да с любовью воспоем
ти:

Радуйся, мученическую кончину свою
предуведешая;

радуйся, страстотерпице царственная.

Радуйся, в день памяти преподобнаго Сергия
страстем Христовым приобщившаяся;

радуйся, силою Божественною в страданиях
укрепляемая.

Радуйся, за мучителей своих, Христу
подражаючи, молившаяся;

радуйся, до самыя кончины твоея песнь Богу
воспевавшая.

Радуйся, кровию своею землю нашу оросившая;

радуйся, к сонму новомучеников Российских
сопричтенная.

Радуйся, яко лику преподобных и праведных
жен приобщилася еси;

радуйся, святых благоверных княгинь земли
Русския достойная сонаследнице.

Радуйся, жертво непорочная, благоприятная,
Богу принесенная;

радуйся, со всеми святыми земли нашея
торжествующая.

Радуйся, святая преподобномученице Елисавето,
красото Церкви Российския, невестою
Христовою быти удостоенная.

Кондак 12

Благодати исполнении сосуди явишася
честныя мощи ваша, святые
преподобномученицы Елисавето и Варваро,
ихже от поругания и безчестия спасти хотяще,
благочестивии людие из России во святой град
Иерусалим принесоша и в веси Гефсиманийстей
на горе Елеон погребоша, к нимже приходящии
ублажают вас, воспевающе Богу, дивному во
святых Своих: Аллилуиа.

Икос 12

Света небеснаго и благоухания чуднаго храм
святыя мироносицы Марии Магдалини во
Иерусалиме исполнися, егда гроб с телом
великия княгини Елисаветы открыша. Темже
ныне Церкви Православныя чада вси радуются
и ликуют о Господе, притекающе к раце мощей
твоих, преподобномученице Елисавето, чудеса
точащих всем верующим, и благодаряще
прославльшаго тя Господа, поют сие:

Радуйся, яко мощи твоя, во святыи град
Иерусалим принесенныя, процветоша
нетлением;

радуйся, мощами твоими Святую Землю с
землею Российскою духовно соединившая.

Радуйся, явлением мощей твоих Церковь
Русскую возвеселившая;

радуйся, тем находящихся в разсеянии
российских людей духовно укрепившая.

Радуйся, у гроба Господня погребенная;

радуйся, во храме святыя жены-мироносицы
Марии Магдалини упокоенная.

Радуйся, яко мощи твоя исцеляют всякия скорби и болезни;

радуйся, свидетельнице вечности в жизни временней.

Радуйся, венец добродетелей в себе соединившая;

радуйся, неисповедимыми судьбами Божиими прославленная.

Радуйся, Горняго Иерусалима обительнице блаженная;

радуйся, ко Иерусалиму Небесному всем нам путеводительнице.

Радуйся, святая преподобномученице Елисавето, красото Церкви Российския, невестою Христовою быти удостоенная.

Кондак 13

О великая страстотерпице, жен российских украшение и радости наша, княгине милостивая Елисавето, прими воздыхание сердец наших, с любовию тебе приносимое, и твоим предстательством ко Господу дух правыя веры и благочестия в нас укрепи, в добродетели и милосердии нас утверди, помози крест скорбей с

терпением и надеждою понести, в любви и согласии народ наш сохрани, да сподобимся в радость Господа внити, со Ангелы и всеми святыми поюще Ему: Аллилуиа.

(Этот кондак читается трижды, затем икос 1 и кондак 1)

Молитва

О святые новомученицы Российския, великая княгине Елисавето и сестро ея крестовая пречестная инокине Варваро, купно путь свой во мнозех муках скончавшия, евангельския заповеди делом во Обители милосердия совершившия, веры ради православныя подвизающися до смерти в последняя времена сия, и добрый плод в терпении страстей Христу принесшия! Молитесь Ему, яко победителю смерти, да утвердит Церковь Русскую Православную и отечество наше, кровию и страданьми новомучеников искупленныя, и не даст в расхищение врагом России достояния нашего. Се бо лукавый враг вооружися на ны, хотя нас погубити в междоусобных бранех, скорбех, нестерпимых печалех, болезнях, нуждах и бедах лютых. Умолите Господа низложить вся немощныя дерзости их; веру в сердцах людей российских укрепите, да егда найдет на ны

испытания час, мужества дар восприимем
вашими молитвами, отвергшися себе и взявше
крест свой, последуем, Христу, распинающе
плоть свою со страстьми и похотьми. Сохраните
нас от всякаго зла, освятите пути жизни нашея,
даруйте покаяние нелицемерное, тишину и мир
душам нашим, испросите у Господа всем нам
мытарств горьких и вечныя муки избавитися и
Небесному Царствию наследники быти со всеми
святыми, от века угодившими Богу, да
радуящиеся воздадим хвалу, честь и поклонение
Отцу и Сыну и Святому Духу во веки веков.
Аминь.

